



Saunia e James J. Hamula

○ Le Fitugafulu

# ○ Le Faamanatuga ma le Togiola


*O le sauniga o le faamanatuga e manaomia ona paia atili ma mamalu ia i tatou taitoatasi.*

I le tauafiafi o Ketesemane ma Kalevario, na faapotopoto faatasi ai e Iesu Ana Aposetolo mo le taimi mulimuli e tapuai. O le nofoaga o le afeafe pitoaluga o se maota o se soo i Ierusalem, ma o le vaitau o le Paseka.<sup>1</sup>

A o lei oo mai ia i latou sa faia ai le tausamaaga masani o le Paseka, lea sa i ai le mamoe e osi ai le taulaga, uaina, ma le areto le faafefeteina, o faatusa ia o le faaolataga o Isaraelu ua tuanai mai le pologa ma le oti<sup>2</sup> ma o se togiola i le lumanai e le i iloa-ina.<sup>3</sup> Ina ua faaiuiu le tausamaaga, sa ave e Iesu le areto, faamanuia ma tofitofi,<sup>4</sup> ma tuu atu i Ana Aposetolo, ma fetalai atu, “Ina tago ia, ina aai.”<sup>5</sup> “O lo’u tino lenei, ua foaiina atu mo outou; tou te faia le mea nei e fai ma faamanatuga ia te au.”<sup>6</sup> I se tulaga lava e tasi, na Ia ave le ipu uaina, ma faamanuia i ai, ma tuu atu ia i latou na vagaia o Ia, ma fetalai atu: “O lenei ipu o le feagaiga fou lea i lo’u toto,”<sup>7</sup> “ua faamaligiina . . . e faamagalo ai agasala.”<sup>8</sup> “Tou te faia le mea nei e fai ma faamanatuga ia te au.”<sup>9</sup>

I lenei tulaga faatauvaa ae matua loloto lava, sa faavaeina ai e Iesu se sauniga fou mo le nuu o le feagaiga a le Atua. O le a le toe faamasaina se

toto o se manu pe aai i aano o manu ma faamoemoe i se taulaga togiola a se Keriso o le a i ai se aso e afio mai ai.<sup>10</sup> Ae, o faatusa o le tino mavaevae ma le toto na faamaligiina o le Keriso na afio mai o le a fetagofi i ai ma taumafaina e fai ma faamanatuga o Lana taulaga togiola.<sup>11</sup> O le auai ai i lenei sauniga fou o le a faailoa atu ai i tagata uma e taliaina ma le naunautai ia Iesu o le Keriso folafolaina ma le faanaunautai o le loto atoa e mulimuli ia te Ia ma tausi i Ana poloaiga.



Ia i latou o le a faailogaina ma faatau- taia o latou olaga [e tusa ma Ana polo- aiga], o le a “laaloo” le oti faaleagaga ia i latou, ma o le a faamautinoa atu i ai le ola e faavavau.

I itula ma aso na sosoo ai, na ulu atu ai Iesu i Ketesemane, sa avatu [o Ia] i Kalevario, ma sa toetu manumalo mai le tuugamau o Arimataia. Ina ua mavae Lona afio a’e i le lagi mai ia i latou, sa feiloai faatasi soo faamaoni o Iesu i totonu ma fafo atu o Ierusalem i le aso muamua o le vaiaso e “tofi- tofi le areto”<sup>12</sup> ma sa latou faia ma le “tumau pea.”<sup>13</sup> O le mea mautinoa, sa le gata ina latou faia e manatua ai lo latou Alii ua alu ese ae ia faailoa atu ai foi le lotofaafetai ma le faatuatua i Lana Togiola ofoofogia mo i latou.

O le mea iloa, ina ua asiasi atu Iesu i Ona soo i Amerika, sa Ia faia foi le faamanatuga ia i latou.<sup>14</sup> I le faia o lea mea, sa Ia fetalai ai: “Ia outou tausisi e faia lenei mea e le aunoa”<sup>15</sup> ma “o le a avea lea o se molimau i le Tama ua outou manatua pea au,”<sup>16</sup> Sa toe faapena foi i le amataga o le Toefua- taiga, sa faia ai e le Alii le sauniga o le faamanatuga, ma tuu mai faatonuga ia i tatou e talitutusa lava ma faatonuga na Ia tuu atu i Ona soo anamua.<sup>17</sup>

O le sauniga o le faamanatuga ua ta’ua o se “tasi o sauniga aupito silisili ona paia i le Ekalesia.”<sup>18</sup> E manaomia ona paia atili ma mamalu ia i tatou taitoatasi. Sa faia e Iesu Keriso lava Ia le sauniga e faamanatu mai ai ia i tatou le mea sa Ia faia e togiola ai i tatou ma ia aoao ai i tatou i le auala e mafai ai ona faamanuiaina lo tatou faaagaina o Lana Togiola ma mafai ai ona toe mau faatasi ma le Atua.

I le falaoa ua tofitofi ma vaevae, tatou te faailoa atu ai o loo tatou manatuaina le tino o Iesu Keriso—o se tino na puapuagatia i tiga, mafatiaga, ma faaososoga o soo se ituaiga,<sup>19</sup> o se tino na tauaveina se avega mamafa

o le tiga lea na matua puna mai ai le toto i pu afu uma,<sup>20</sup> O se tino na matua sasaina ma le fatu na nutimomoia i le faasatauroga.<sup>21</sup> Tatou te faailoa atu lo tatou talitonuga o lena lava tino e tasi na taatia ua maliu, sa toe faatuina i le ola mai le tuugamau, e le toe oo i ai se ma'i, pala, po o le oti.<sup>22</sup> Ma i lo tatou aai ai i le falaoa, tatou te faailoa atu ai e faapea, e pei foi o le tino o Keriso, o le a faasaolotoina foi o tatou tino mai noataga o le oti, ma toetutu manumalo mai le tuugamau, ma toefuatai atu i o tatou agaga e faavavau.<sup>23</sup>

I se tamai ipu vai lava, tatou te faailoa atu ai tatou te manatuaina le toto o Iesu na faamaligiina ma mafatiaga faaleagaga na Ia onosaia mo tagata uma. Tatou te manatua ai le tiga na mafua ai ona puna tele mai le toto na maligi i Ketese mane.<sup>24</sup> Tatou te manatua ai le sauaina ma le sasaina na Ia onosaia mai ia i latou na faapagotaina o Ia.<sup>25</sup> Tatou te manatua ai le toto na Ia faamaligiina mai i Ona lima, vae, ma le itu a o i ai i Kalevario.<sup>26</sup> Ma e tatou te manatua ai Ona lava Ia manatu i Ona puapuaga: “O le ā le tetele o le tiga e te le iloa, o le ā le malosi e te le iloa, ioe, o le ā le faigata ona onosaia e te le iloa.”<sup>27</sup> I lo tatou inuina o le vai, tatou te faamamaluina ai Lona toto ma puapuaga na togiola ai a tatou agasala ma o le a Ia totogi a tatou agasala pe a tatou opogi ma taliaina mataupu faavae ma sauniga o Lana talalelei.

O lea, i le falaoa ma le vai, ua faamanatu mai ai ia i tatou le Togiolaina e Keriso o i tatou mai le oti ma le agasala. O le faatulagaga o le falaoa e muamua ae lona lua le vai [i le faamanatuga] e taua. O le taumafa i le falaoa, ua faamanatu mai ai ia i tatou lo tatou lava toetutu i le taimi mulimuli, lea e aofia ai le sili atu i lo le na o se toefuataiga o le tino ma le agaga. E ala i le mana o le Toetu, o le a toe foi atu ai i tatou uma i le afioaga o le

Atua.<sup>28</sup> O lena tulaga ua tatou fetai ai ma se fesili taua o o tatou olaga. O le fesili taua o loo feagai ma i tatou uma e le faapea pe o le a tatou ola ea, ae o ai o le a tatou ola faatasi pe a mavae le oti. E ui o le a toefoi atu i tatou uma taitoatasi i le afioaga o le Atua, ae e le o i tatou uma o le a mau faatasi ma Ia.

Ona o lo tatou olaga faaletino, tatou te eleelea uma ai lava i le agasala ma le solitulafono.<sup>29</sup> O le a i ai o tatou mafaufauga, upu, ma galuega o le a le mama.<sup>30</sup> I se aotelega, o le a tatou eleelea. Ma o taunuuga o le eleelea i le afioaga o le Atua, sa faamanino atoatoa mai e Iesu: “E leai se mea le mama e mafai ona mau . . . i ona luma.”<sup>31</sup> Na matuai manino lena mea moni ia Alema le Itiiti lea na fetai ai ma se agelu paia, sa matua mafatia, faanoanoa, ma tiga i lona le mama lea na ia manao ai ia “tinei i le agaga ma le tino, ina ia le aumaia ai o [ia] e tu i luma o [le] Atua.”<sup>32</sup>

I le feinu ai i le vai o le faamanatuga, ua aoaoina ai i tatou i le auala e mafai ai ona faamamaina i tatou mai le agasala ma le solitulafono ma mafai ai ona tu i luma o le Atua. E ala i le faamaligiina o Lona toto lē sala, sa



faamalie ai e Iesu Keriso ia manaoga o le faamasinotonu mo agasala uma ma solitulafono. Ona Ia ofo mai lea e faamama i tatou pe afai e lava lo tatou faatuatua ia te Ia e salamo ai; talia uma sauniga ma feagaiga o le faaolataga, lea e amata i le papatisoga; ma le taliaina o le Agaga Paia. O lo tatou mauaina o le Agaga Paia, e faamamaina ma faapaiaina ai i tatou. Sa matua faamanino mai e Iesu lenei aoaoga faavae:

“E leai se mea le mama e mafai ona ulu atu i le malo [o le Atua]; . . . e leai se mea e ulu atu i lona malologa vagana ai i latou o e ua faamamaina o latou ofu i lou toto. . . .

“O lenei o le poloaiga lenei: Ia salamo, outou tuluiga uma o le lalolagi, ma o mai ia te au ma ia papatiso i lou igoa, ina ia faapaiaina outou i le taliaina o le Agaga Paia, ina ia outou tutu ma le le pona i ou luma i le aso gataaga.”<sup>33</sup>

O le mataupu lenei a Keriso.<sup>34</sup> A tatou taliaina lenei aoaoga faavae ma faatautaia o tatou olaga e faatatau i ai, e fufuluina moni lava i tatou i le toto o Keriso ma mama ai.<sup>35</sup>

E ala atu i tatalo o le faamanatuga, ua tatou faailoa atu lo tatou taliaina o lenei aoaoga faavae a Keriso ma lo tatou tautinoga e ola e faatatau i ai. I la tatou aioiga i le Atua lo tatou Tama Faavavau, ua tatou tautino atu ai o le a tatou “manatua pea” Lona Alo pele. Muamua, tatou te molimau atu lo tatou “naunautiga” e manatuaina. Ona tatou molimau atu lea tatou te manatuaina. O le faia o lea mea, ua tatou faia ai ni tautinoga e faaoga le faatuatua ia Iesu Keriso ma Lona Togiolaina o i tatou mai le oti ma le agasala.

Tatou te tautino atu foi o le a tatou “tausia ana poloaiga.” O se tautinoga faamaoni foi lea ia salamo. Afai o o tatou mafaufauga, upu, po o amioga ua le tusa ai ma le mea sa tatau ona i ai i aso ua tuanai, ia tatou toe tuuto atu i



tatou lava ina ia faaogatusa atili o tatou olaga ma Lona soifuaga i aso o lumanai.

E sosoo ai, tatou te tautino atu foi ua tatou “loto e ave i o [tatou] luga le suafa o [le] Alo.”<sup>36</sup> O se tautinoga faamaoni lea e gauai atu ai i tatou lava i Lana pule ma faia Lana galuega, lea e aofia ai lo tatou mauaina mo i tatou lava o sauniga faaola uma ma feagaiga.<sup>37</sup>

A tatou tuuto atu i tatou lava i nei mataupu faavae, ua folafola mai ia i tatou i tatalo o le faamanatuga o le a tatou “maua lona Agaga e faatasi ma i [tatou].”<sup>38</sup> O le toe faafouina o le Agaga o se tasi lea o faamanuiaga silisili, ona o le Agaga o le sui lea e faamamaina ma faapaiaina i tatou mai le agasala ma le solitulafono.<sup>39</sup>

Uso e ma tuafafine, o le mea sili ona taua na tupu i le olaga nei ma le faavavau o le Togiola a Iesu Keriso. O Ia o le na faataunuaina le Togiola sa aumaia ia i tatou le sauniga o le faamanatuga e fesoasoani ai ia i tatou e le gata ia manatua ai ae ia tatou maua ai foi faamanuiaga o lenei faatinoga silisili o le alofatunoa. O le auai soo ma le naunautai i lenei sauniga paia e fesoasoani lea ia i tatou ia faaauau pea ona taliaina ma ola i le aoaoga faavae a Keriso pe a mavae le papatisoga ma tulitulimatagau ai ma faamaea le faagasologa o le faapaiaina. O le mea moni, o le sauniga o le faamanatuga ua fesoasoani ia i tatou ia tumau ai ma le faamaoni seia oo i le iuga ma maua

ai le atoatoa o le Tama i le ala lava e tasi na maua ai e Iesu, o le alofatunoa mo le alofatunoa.<sup>40</sup>

Ou te molimau atu o le mana o Iesu Keriso e togiola ai i tatou uma mai le oti ma le agasala ma o le mana o sauniga o Lana perisitua, e aofia ai le faamanatuga, o le saunia lea o i tatou ia “vaai i fofoga o le Atua, le Tama lava, ma ola.”<sup>41</sup> Tau ina ia tatou mauaina le faamanatuga i le vaiaso fou, ma vaiaso taitasi e sosoo ai, i se manaoga loloto atu ma se faamoemoega sili atu ona naunautai, ou te tatalo ai i le suafa o Iesu Keriso, amene. ■

#### FAAMATALAGA

1. Tagai Mataio 26:17–20; Mareko 14:12–17; Luka 22:7–18.
2. Tagai Esoto 12; Numera 28:16–25; Bible Dictionary, “Feasts.”
3. Tagai Esoto 13:12–13; Mosaea 2:3–4; Mose 5:5–8.
4. Tagai Mataio 26:26; Mareko 14:22; Luka 22:19; 1 Korinito 11:24. I se eseese, ina ua faia e Iesu le faamanatuga i sa Nifae ina ua mavae Lona Toetu, na Ia tofitofi le areto, ona faamanuia lea (tagai 3 Nifae 18:3).
5. Mataio 26:26; Mareko 14:22; 1 Korinito 11:24.
6. Luka 22:19; tagai foi i le 1 Korinito 11:24.
7. Luka 22:20; tagai foi i le Mataio 26:28; Mareko 14:24; 1 Korinito 11:25.
8. Mataio 26:28.
9. Luka 22:19; tagai foi i le 3 Nifae 18:11.
10. Tagai 2 Nifae 11:4; 25:24–25; Iakopo 4:5; Alema 34:14; 3 Nifae 9:17, 19–20; Mose 5:5–8.
11. Tagai Ioane 6:51–57; 1 Korinito 11:24–26; Mataupu Faavae ma Feagaiga 20:40.
12. Galuega 20:7.
13. Galuega 2:42.

14. Tagai 3 Nifae 9:19–20; 18:1–11; 20:3–9; 26:13.
15. 3 Nifae 18:6.
16. 3 Nifae 18:7.
17. Tagai Mataupu Faavae ma Feagaiga 20:75; 27:2; 59:9–12.
18. *Aoaoga a Peresitene o le Ekalesia: Iosefa Filitia Samita* (2013), 96. “I lo’u lava ia manatu o le sauniga faamanatuga o le sauniga aupito sili lea ona paia, ma silisili ona mamalu, i sauniga uma a le Ekalesia” (*Aoaoga: Iosefa Filitia Samita*, 95).
19. Tagai Alema 7:11.
20. Tagai Luka 22:44; Mosaea 3:7; Mataupu Faavae ma Feagaiga 19:18.
21. Tagai Salamo 22:16; Ioane 19:33–34; 20:25–27; 3 Nifae 11:14; Mataupu Faavae ma Feagaiga 6:37; James E. Talmage, *Jesus the Christ*, 3rd. ed. (1916), 669.
22. Tagai Mataio 28:6; Luka 24:6, 39; Ioane 20:20; Mataupu Faavae ma Feagaiga 76:22–24.
23. Tagai Ioane 6:51–59; Alema 11:42–44; 40:23; 3 Nifae 27:13–15.
24. Tagai Luka 22:44; Mosaea 3:7; Mataupu Faavae ma Feagaiga 19:18.
25. Tagai Isaia 53:5; Mataio 26:67; 27:26, 29–30; Mareko 14:65; 15:15, 19; Luka 22:63–65; Ioane 19:1; Mosaea 15:5.
26. Tagai Mataio 27:35; Mareko 15:15; Luka 23:33; Ioane 19:16, 33–34.
27. Mataupu Faavae ma Feagaiga 19:15.
28. Tagai Alema 11:42–45; 3 Nifae 27:13–15.
29. Tagai Mose 6:55.
30. Tagai Mataio 5:27–28; 12:36; Iakopo 3:1–13; Mosaea 4:29–30; Alema 12:14.
31. Mose 6:57; tagai foi i le 1 Korinito 6:9; Efeso 5:5; 1 Nifae 10:21; 15:33–34; Alema 7:21; 11:37; 40:26; 3 Nifae 27:19; Mataupu Faavae ma Feagaiga 1:31–32.
32. Alema 36:15; tagai foi i le fuaiupu 14; Faaaliga 6:15–17; Alema 12:14.
33. 3 Nifae 27:19–20.
34. Tagai 2 Nifae 31:2–21; 3 Nifae 11:31–41; 27:13–22; Mataupu Faavae ma Feagaiga 76:40–42, 50–54, 69–70.
35. Tagai 3 Nifae 27:19; tagai foi i le Faaaliga 1:5–6; 7:14–15; Alema 5:21; 13:11–12; Eteru 13:10–11; Mose 6:59–60.
36. Mataupu Faavae ma Feagaiga 20:77; Moronae 4:3.
37. Tagai Dallin H. Oaks, *His Holy Name* (1998); Dallin H. Oaks, “O Le Ave i o Tatou Luga o le Suafa o Iesu Keriso,” *Liahona*, Iulai 1985, 76–79.
38. Mataupu Faavae ma Feagaiga 20:77, 79; Moronae 4:3; 5:2.
39. Tagai Roma 15:16; 1 Korinito 6:11; 2 Nifae 31:17; Alema 5:54; 13:12; 3 Nifae 27:20; Moronae 6:4.
40. Tagai Mataupu Faavae ma Feagaiga 93:6–20.
41. Mataupu Faavae ma Feagaiga 84:22.